

童山文集

童山文集卷十七

綿州李調元雨村

墓誌銘下

勅授文林郎晉封奉直大夫山東泰安縣知縣何
瑞菴墓誌銘

何瑞菴余姻家也今年二月初四日余壻耀茹以書來
請曰先君瑞菴公以正月初四日卒今將歸窆念先君
嘉言懿行刻得銘壙而相知無如吾岳者請銓次爲誌
以沒均感余聞之自慙不文旣而思瑞菴與予少同戲
於竹馬長又結爲薦羅生平行事固未有詳悉如予者

非余其孰能銘瑞菴諱人麟字玉書其先江南無錫人也九世祖清明萬歷間爲綿州指揮封武畧將軍子孫遂家焉清牛憲圖憲圖生繼武繼武生永靖俱襲前職永靖生天章庠生成章醫官值獻賊亂匿山洞僅以身免天章生坤庠生是爲瑞菴之祖以孫貴 贈贈奉直大夫祖妣王氏 贈宜人坤生子二璉涵璉庠生官至雲南雲龍州吏目璉祿豐縣丞兼縣事涵由庠生入太學卽瑞菴父也以子貴 封修職郎妣嚴氏 封宜人瑞菴生而慷慨有智畧不屑屑生產讀書畧通大意善作文工楷書兼草篆然志不在科舉少與余同窓每對

黃卷青燈輒嘆曰大丈夫要當于盤根錯節中見利器耳吾非蠹書蟲安能生死文字間哉後于丙子己卯兩科不售遂決意進取援例授劍州訓導時金川用兵奉檄辦武連站支應滿漢官兵軍火餉餉供應兩載絲毫無缺大吏以爲能遂令代辦劍州事時乾隆三十六年也三十八年十月十六日總督文公綬奏調赴南路明將軍大營辦寫奏摺登記冊檔君卽馳驛出口至僧格宗大營三十九年隨明將軍進攻馬奈當是時長蛇未殲列陣相持虎帳龍韜雷轟電掣羽書奔馳席不暇煖而君才本敏捷膽力過人日草萬言倚馬可待雖兩兵

交接之際幾中鎔傷而君了無懼色遂佐成功將軍深
器之不離左右復因後路軍糧急迫檄往瀘城章谷噶
達城等站催趲夫糧俱咄嗟而辦益以爲能方將大用
而父訃適聞君大慟卽報明奔喪總督文公謂將軍曰
此人軍營斷不可少何可令其去乎卽奏明仍留軍營
守制四十年四月調壁昺寧縣教諭未之任卽委赴兩
路軍營清查站卡時值進攻科曲步山梁總督富公以
君明白幹練奏明留軍營辦站隨由墨魯古改委勦烏
圍隨浙藩郝公碩臬司白公瀛赴噶拉衣前抵八卦碕
支應各山梁營卡軍糧軍火三月初八又委隨白公催

運後路各站存貯勒烏圍噶拉衣軍糧隨閱丈促浸憤
拉地畝大兵凱旋始隨白公回省蓋自三十六年軍
興以來至四十一年始終軍營六載有餘辦理檔案各
務未嘗遺誤者君一人而已金川既平又委辦軍需局
奏銷君以父未葬請假治喪事甫畢卽催赴局十月初
六總督以君久歷塞外奮勇出力卽專奏請以知縣卽
用奉旨俞允並錄平定金川案軍功一等加一級隨
帶又辦理兵差案復議軍功加一級隨帶四十二年二
月山東請員奉上諭發往歷署惠民定陶平原等縣
遇事敢爲每有建白輒爲大吏器重是年承辦德州

皇差于上駟院更換馬疋不誤補授蓬萊縣知縣四十
八年調繁泰安縣次年恭逢 皇上南巡辦理泰山岳
廟 欽工並白鶴泉及魏家菴兩行宮俱不誤次年二
月初六于新庄道旁迎 駕 上命軍機處記名並
恩賞貢緞二疋荷包一對並加一級五十年山東巡撫
以君奏最第一卓異候聖當是時皆以君久膺 上眷
大用可操券矣乃旋以承審東平案婦袁劉氏薦京赴
控伊兄圖產逼嫁一案部議以承審遲延鐫二級調用
衆論惜之其罷職也兩袖清風而官項累累得歷城義
士孟文獻資助萬金乃得解去先是母嚴宜人年老多

若心寬厚待人誠信少年家計艱窘乃由秦入蜀爲什
一之計備歷辛苦數十年來乃克成業教子以詩書傳
家以孝弟皆公之訓也公善釀有杜康之風以此起家
至今稱善釀莫不以西關朱家爲第一余固不文然忝
在姻誼又其孫綬從余學故知之甚悉爲述其畧庶無
誣義之憾焉公娶張氏生子二長承祿次承壽孫五綬
繡紘承祿出綱紀承壽出銘曰

巍巍岡陵鬱鬱松栢萬古藏形百世流澤

處士郭世藩墓誌銘

公名繼先字世藩年六十有七卒于庚寅之歲安厝於

後山之陽所生四男五女季男歲進士幹生大有掇武
科大升入黌序幹出余 先大夫門下丙午余遊太白
之青蓮鄉會登其堂見嘉樹森列鬱鬱有佳氣隨謁先
塋左抱匡山右浥涪水鼓篠杉藤皆雲蒸霞蔚益信其
發脈所自來爲之留詩而去今年春正晦日郭子踵門
而告余曰先君之塋子所知也舊有石爲風雨所剝蝕
字跡模糊乞爲銘以重鐫可乎予惟明德之後必有達
人積善之家必有余慶所謂善言天者驗於人也顧天
之理微而難知而見于人則顯而易察今郭公之後而
熾而昌若此豈非天之報施善人不爽乎因爲之銘曰

龍蟠者山耶虎卧者石耶森森者蘭耶桂耶鬱鬱者松耶柏耶嗚呼盛哉此天所以報公之德耶

張孺人程氏墓誌銘

孺人程氏廣漢明經佩之女張冠玉公之子庠生凌霄妻也生于康熙五十年辛卯三月初七日酉時卒于乾隆四十六年辛丑六月二十八日酉時自二十一歲守節以至卒享壽七十有一既建坊以旌例得埋石爲誌初凌霄公之歿也誓以身殉明經責以撫孤大義始起視事所生二男一女一仁壽一邦伸皆幼姑早亡其舅已老一室蕭然惻獨無依孺人哭其夫三年不御酒肉

未嘗一日去舅側而伯舅姑沒所遺三男邦璧邦璨邦
璵皆撫如已子令與仁壽同寢處迄長成始析令成家
邦璧等亦終身事之如生母焉甲子春舅冠玉公歿盡
哀盡誠讀禮畢始專以教子爲事日則送塾從師夜則
篝燈自課稍怠則鞭笞隨之一日邦仲偶倦孺人手捉
其耳責曰汝父彌留時目汝兄弟囑曰我生平未竟之
志將于二子是竟汝善教之務成我志毋使我目不瞑
也吾刻不能忘今昏惰若此吾無以見汝父于地下矣
且責且泣邦仲等自是發憤不敢坐荒每聞聲息如同
嚴父卒成令名癸酉甲戌二子相繼登上庠同赴成都

靜室如足三載足不履闔至壬寅秋頓覺心胸開拓却
于古人公案叅不透徹自思非影不清由鏡不明復念
云假使熱鐵頂上旋終不得此菩提心明知悉是幻鏡
却做主宰不得大抵是擺脫不開若究明此事必須懸
崖撒手大死一回方可遂於佛前洗心懺悔痛哭嗟咄
將衣物散衆筆墨盡焚乃率徒孫至集鳳峯坪示衆余
坐脫之後便埋于此是晚入坐抖擻精神發起勇猛焚
香一支立定誓願放身捨命拚死恍如死去當此之時
一切心識都沒有了只者知沒有的亦沒有了不過寸
餘香忽窓外瓦落一響復蘇漸覺燈光燦燦一切房屋

重刊...
物件猶如新生一般自覺是個好消息靜坐片時通身
輕快卽和身權睡黎明徐步出外閱歷山河種種清幽
而自身病魔亦消於是檢閱素疑公案如推門入臼無
用思擬譬如得本便知其末遂援筆說偈十餘首以示
大衆時居中元速裴晉省謁師於什加羅漢寺師云因
何事來此余云違師數年尙有未了事來問師云何不
有事令無事無事令有事余云者回不是者個事然却
不敢格外生事其師凝睇久之忽欣然笑曰看徒氣靜
神恬怪道人言在凌雲認真叅究今日一見信不虛也
我年邁矣留爾在此越二日 任明府降寺對寶光善

度和尙遂印可禮汀爲法嗣由此經理常住于乙巳秋
開堂主席十有三年矣今年欲爲暫退衆請再留因其
年老共爲修塔以垂將來乞余爲序夫禮汀之與余交
也歷有年矣其自凌雲而主是席也當是時寺雖有羅
漢之名而無其實禮汀念馬祖道場荒蕪日久乃竭力
募化建東西兩廊共十二間先刊明吳興學博必山居
士所著宋乾明院羅漢圖延成都塑工曹志偉肖五百
阿羅漢像于兩廊又得邑令會稽寧湘維明府一力襄
贊于甲寅冬藏事復鑿羅漢池洵馬祖井添立亭臺補
栽松竹于是遂爲什邡名利而禮公之志亦遂矣竊常

以儒家而論自周秦西漢以上無言佛者至北魏世祖
詔及唐傳奕宗宋祁始以爲釋氏本於老莊然自白馬
馱經以來貝葉流傳於今具在皆本橫行梵字譯爲震
旦之文非剽竊老莊以成篇也顧常詳讀內典叅求宗
旨與老氏則秦越與莊列實伯仲莊子曰莫大於秋毫
之末而太山爲小莫壽于殤子而彭祖爲夭此卽芥子
須彌閻浮粟葉之義也列子曰視生如死視富如貧視
人如豕視吾如人此卽吾手何如佛手吾脚何如驢脚
之義也伏聞佛家有觀白骨法謂淨坐澄慮存想自身
血肉腐壞惟存白骨與吾相離自一尺以至尋丈要見

形神元不相屬則自然超脫矣此卽舍命拚死之義也
知此則無爲首生爲脊死爲尻充之以至鷄彈輪馬鼠
用蟲臂積漸假借化此身爲異物則形與神離超然無
所往而不可矣禮公之言亦卽佛家觀白骨之法也顧
此理向無人道而禮公獨于此叅透宗旨豈非馬祖之
後又出一馬祖乎至于工吟咏善書畫鈔凌雲之詩刊
茱萸之譚則又其餘事也諸徒將以今年某月某日爲
之築生塔蓋卽生壙之義也乃爲之銘曰惟我禮公江
南名族少愛山林長戀名利乃泝岷峨矢志薙髮九項
拚身什邡任足何以得道是由慧業何以精進實由踐

實五誠爲教人識刊落觀彼恩愛革囊盛血視諸苦海
雪山吹藥五百羅漢第一功德飄然舍去歸入淨域淨
域者何復歸寂冥人生此身四大和合髮毛爪齒皮肉
筋骨皆歸于地六根所作唾涕膿血津液涎沫皆歸于
水因緣假合卽知此身畢竟無着安時處順非幻非滅
知此理者當與莫逆惟我禮公全始全末

童山文集卷十八

綿州李調元雨村

行述

諱封奉政大夫同知順天府北路事石亭府君行述

嗚呼府君其竟逝耶其竟棄不孝等而長逝耶憶府君於臘之二十四日因委估盤山廟工過京謂不孝調元曰吾近來因署密雲大差又兼諸事叢雜心力俱竭夜卧不安汝其檢點藥書中治怔忡驚悸者開一二方並買同仁堂天王補心丹八兩隨帶不孝調元敬遵令抄

錄購辦府君方欲動身不孝調元仰謂府君曰旣如此
心虛何不告病調理府君曰這回上省必請暫解調攝
旣而盥面畢攬鏡自詆曰顏何太赤耶不孝調元旁言
此皆心火之故雖不宜參然先服清心藥後宜參調補
不孝調元以府君行裝已駕卽步行至市換參歸則府
君已騎馬先行留長隨一人在後取參嗚呼孰知此卽
永訣之時耶府君自服官以來從未得一日閒暇亦從
未得享一日鮮衣美食頓遭慘變罹此大凶一回思之
痛入五內且不先驅螻蟻於地下復何敢偷生人世俯
仰宸號顧念府君平生偉行軼事實能追步前賢而服

官政績可入循良傳者甚夥粗記梗概祇恐遺漏不敢

失誣伏望 仁人大君子俯賜採擇焉府君姓李氏諱

化楠

通家生王
文治填諱

字廷節號石亭世居四川羅江縣之南

村壩李家灣先王父英華公生府君三人次諱化梗國

學生又次諱化樟庠生長卽府君也先是先王父娶先

王母趙氏七年無子康熙五十二年癸巳往成都石經

寺求子歸先王母卽有娠閏六月十四日先王父卧前

廳夢一道人送一穿靴頂帽相公來甫入門卽報府君

生生卽穎異喜讀書尤好經義家貧兼耕嘗攜一經就

隴畔讀之故未弱冠卽補博士弟子員時邑侯爲上元

王川齋先生傳見而器重之延入衙齋以己子現任四川樂山令諱鉞者使就教而已授府君以文藝自是所學日益進科歲考無不超等所作制義才脫稿已傳頌人口二十九歲入選拔中辛酉舉人聯捷壬戌進士人皆以府君爲破天荒蓋羅江前此無登黃榜者旋考入臧安宮教習不就而歸遠近從學者常百人執經問難殆無虛日辛未將北上謁選不孝調元送于綿之江干府君謂不孝曰從來執綯習氣大半皆望捐納不肯讀書汝如不秀才不必來任所吾斷不汝捐也謹拜受命以足悉心舉子業未幾卽入泮是年六月府君檢發

浙江委用遇壬申

萬壽恩科爲同考官得奎君服

惠顧君朝宗陸君燦俞君經施君禮耕賀君宗賢溫君
萬年七人而李君祖惠以耆名士馳聲於大江南北幾
五十年得冠榜首出門下人皆服府君知人主考李鶴
峰先生贈府君詩有句云吾宗有墨綬峨岷發精英乍
如得荆璞價重十二城遺我共欣賞古色果崢嶸蓋深
爲得人慶也次年卽補餘姚姚巖邑也濱海自土林至
蘭風七鄉通錢塘江橫亘八九十里有大塘新塘局塘
潮塘之別歲久不治雍正初年獨大塘存而埧損過半
葉令瑄文乃勸民築堤名榆柳塘十二年張令永熹又

於塘外勸築利濟土塘以此層次保衛顧旋築旋圯海潮仍爲民患乾隆十二年潮忽大至淹沒民田四五萬畝前任王令請帑一萬七千五百餘兩各灶修築謂之以工代賑未幾王謝病去十五年府君到任時值防秋七月十六至十八日颶風挾雨大至吹瓦拔木三晝夜不止府君戰慄乃跪庭中祝曰海地窮民甫離災難若天不降康堤潰水溢民其爲魚水旱頻仍罪在長吏願身受罰爲此方民暫延殘喘祝畢隨分役查看水勢天微明廟山巡檢俞漣馳報水幾潰澁賴東南風大作而潮竟不至人皆以爲府君至誠所感云姚邑

里民頑爲盜賊出沒之藪 府君到姚點視案牘賊未
及獲而首犯在逃者百餘案乃銳意除盜立比期懸賞
格一時小賊多擒而巨猾依然脫網因思緝權不可專
委捕快因密錄難獲猾賊四五人名於票夜喚皂隸李
兆民壯婁恩至署出票袖中而諭之曰賊某等現藏某
所爾若依限獲受上賞否則革役二役唯唯退不三日
積賊景三擒至內外無知者又十餘日而逸賊張子顯
張文紹陸通儒鄒士元繆允年孫善平等先後就擒審
出屢次行竊及賄囑勢豪州同楊某串捕庇縱名實情
通詳分別軍流抵罪而重賞兆恩二役合邑驚以爲神

乃將小賊別立一局名曰枉生所關賊局中自捐俸鈔給以口糧使城中坊舖有執業人如梓匠餅師之類使爲賊師並假官錢以爲資本使賊學其技藝漸能熟習使其師具呈保出以是人多感悔爲良民終其身不復作賊上憲大加稱賞並飭諸縣頒行此式時值荒災府君記算戶口大小先使人密訪實數以故奸吏侵蝕立能指摘制府按臨查災府君隨制府乘輿凡某都某圖皆能口說手畫如指上羅紋一絲不紊人俱服其敏諳設立姚江書院延李君祖惠爲院長使諸生肄業其中刻有姚江課士錄凡先君所刻文姚人俱編爲一集名

爲石亭公治姚紀畧互相歌誦丙子八月充房考又得
士七人王君學濂汪君治錢君大鯨王君世維黃君璋
陳君塤施君純熙也不孝調元是科應本省鄉試下第
來浙九月調繁秀水二十二年恭遇

皇上南巡秀

水爲全浙門戶上憲以府君精幹使辦頭站大營盤
府君日夜運籌竭盡心力不孝調元等一處安卧而不
見面者凡三閱月於城北窪地填起園亭一望花園錦
簇供備直壓兩江大差事竣卽調署平湖縣前縣令
翟軾七年高卧一應詞案積至三千有奇凡已出票者
俱不審理一任胥役詐騙民不勝拖累之苦府君到任

黎明坐堂三鼓方罷每日分三刻立定自課章程早審若干件午審若干件晚審若干件先期掛牌坐大堂三餐皆小碗碟送堂上大開頭門聽民觀聽每審一案聘閣邊擁擠千人莫不拍手呼快或衆中有心未服而不敢言府君必招出委婉商確更定且以信服民掛牌從不改期以是積案爲之一清先是乍浦多賊鷄犬無寧府君復捐俸修大厦數十間名曰自新所關賊其中教學手藝一如餘姚之法居民安堵幾於夜不閉戶故當日有七年如雲烟兩月見青天之謠奉部駁仍回秀水去之日焚香送者數萬哭聲震野如失父母不僅脫靴

立碑衣傘之踵至也旋蒙兩浙中丞現任直隸總督楊
制軍軫以府君爲天下循良第一保舉堪任知府其入
奏有承辦一切差務俱盡心竭力不辭勞瘁洵屬通省
中有爲有守之員等語未經引見丁先王父憂府君
哀毀骨立水漿不入口者旬餘然新任未到坐草薦決
事筆不停披抱傷懷而應繁劇幾成癆瘵戊寅春回里
營措喪事巨細經心盡一年葬先王父於祖墳之雲龍
山是科己卯不孝調元赴本省鄉試府君送入成都頭
場畢以草稿呈府君府君喜見鬚眉謂親友曰吾子魁
矣榜發不孝調元果中第五名十二月不孝調元北上

府君送至皂角舖示以長句有昔我登龍二十九慚愧
變坡非我有汝今年小志方強健勵摩空未可當之句
蓋自傷壬戌館選不預而以勗不孝也庚辰不孝下第
府君服闋來京同寓邸店七月府君補行引見保舉
堪勝知府奉旨發往直隸以同知用時携不孝調元
移寓於大馬神廟之戶部郎中梧岡先生查驥宅歸謂
不孝曰官爲木末正當圖報以是月攜不孝至保定八
月委署滄州州爲四方積盜之窩各省指名提犯者紛
如落葉府君先按村庄人數造戶口清冊冊內載各村
男丁年貌按冊探索無不弋獲以是遠近提人犯者隨

提隨得前任直隸制軍方公

觀

深嘉之辛巳

恩科

不孝調元以會試薦卷取中副榜充內閣中書與國子
監學正人稱爲中正榜府君與書曰紫薇舍人與國子
先生最極清貴將來鼎甲之基也勉之壬午十一月署
涿州所謂天下繁難第一州也王畿總漕差使絡繹府
君日則應付十五省驛務夜則審理詞訟倥傯之中自
覺游刃有餘時涿方災旱奉 旨賑濟府君嚴查胥吏
務使均沾實惠復自捐俸煮粥加賑一月時不孝調元
補國子監學錄府君召至盧溝橋謂曰終成進士乃佳
耳明年癸未不孝調元會試第二名捷音至涿府君諭

日旣成進士又喜高魁然不得翰林不貴也閏月不孝
調元殿試二甲十一名擬鼎復失府君論曰翰林與
鼎甲固無間也五月御試第五名選入一等欽點
翰林院庶吉士府君書訓不孝曰館選可以酬讀書之
志矣但須刻意詩賦方不愧爲詞臣汝其勉之九月題
補天津府海防同知甫到任卽奉差查南嶧河工途中
聞先王母訃府君卽日奔喪傷懷尤甚不孝送至涿州
十六里蕭寺中拜別府君謂曰汝可回矣大司寇味經
先生田吾與汝同師也嘗謂謙卦六爻皆吉此一字可
以奉之終身戒之戒之歸里後安厝事畢爲邑侯楊公

周冕所聘建東門石橋造魁星閣創雙江書院蓋楊公
以府君精能信實賴以濟事而府君亦欲倡起人文不
爾繁瑣故居家三載亦席不暇暖云丙戌不孝調元散
館改授文選司主事府君將來京途中聞之書諭不孝
曰衙門雖改官階轉優況天官爲六部之長而銓曹最
清要之地汝須留心部務和好同事取重上官精神自
惜而才華收斂則老父可無憂矣不孝調元謹拜命不
敢忘府君抵保定卽署霸州又署薊州皆甫閱月卽卸
事去之日父老攜幼泣送者不絕於路丁亥提補宣化
府同知駐新保安城孤人稀竊賊最夥府君立查更之

法以紅布製小旗三十二面半爲守旗半爲望旗蓋取
守望相助之意夜先以守旗傳各巷巡夫領去四更遣
人另以望旗換回天明卽令巡夫當堂驗旗如非望字
號者查出立責以是地方寧謐奸宄潛踪府君以地僻
無事携孫朝礎前往自課戊子四月調順天府北路同
知尙未引 見卽委辦平谷城工府君往來城上巡視
一磚一石無不過目又署密雲承辦木蘭 大差是時
十日晴雨間作府君日夜親身督辦不避風沙馳驅塵
泥中不得寢食者凡兩月又兼以審理剪髮案已得評
陷實情而詳稿未定 行在軍機大臣差筆帖式提犯

府君不肯給發爲軍機所叅旋蒙本道明公面稟大
學士忠勇公公以府君實屬能事其勒犯不發乃傳聽
之誤奏請寬免奉 旨仍回原任府君以 聖恩高
厚思報萬一乃於 回鑾之日俯伏道旁恭接
聖駕請罪謝 恩蒙 上垂問曰你是李化楠否會辦
事已饒了你了府君摘帽叩頭 上回顧大臣笑曰這
胖官兒可謂強項矣府君軀素壯大故云人皆謂府君
半世辛勤得邀 天語褒嘉遭逢實爲難得開府當在
目前而不知心力兩勞病亦從此伏矣時新制軍卽前
任浙撫楊宮保公爲府君一生知己恩憲又備員屬下

道出密雲聞此信亦深嘉之府君亦自謂有緣不惜鞠躬報効而制軍亦深信府君忠誠可托方欲保薦大用而府君旋即去世矣嗚呼痛哉今年四月不孝譚元奉侍宜人來直圖團圓之樂乃不孝譚元北闕下第而在平谷喪七弟在密雲喪八弟運數乖蹇無一遂心之事又兼公務勤勞刻無寧晷雖到京一過不孝譚元欲得從容奉饌不可多得十二月十九日到京之時不孝譚元先爲本部堂官保舉堪勝直隸州知州私心以作京官久不諳作吏且且擊府君作吏苦辛是以遲遲欲辭請之府君府君曰功名有定朝廷官豈可擇著敎

耶旣而引見未用府君聞之謂不孝曰可謂天從人願矣遂往盤山而去然不孝竊窺府君精神恍惚再四請問又不答二十四日過京請安府君謂不孝曰我前日病今清白矣是夜宿不孝寓不能寐復起飲酒盡一觔乃稍稍卧先是壬申在餘姚亦以勞心過度有痰迷之症已經痊愈不發者十七年矣是時府君早起坐不孝調元於床沿謂不孝曰我病中恒恐恐然似是怔忡今雖好然心內懸空急需以補藥調養命不孝抄方隨帶不孝以府君語言明白絕不疑前症之發嗚呼孰知三十七日於保府舊病忽發痰氣上迷竟致不救相隔

才兩日遽成永訣哉府君爲人壯貌雄偉氣度豁達而
一種磊落英爽之概恒使人對之而生敬平生樂談陰
陽奉行功過格惟謹期於累萬故匾其廳曰萬善堂每
云白日莫閑過每日須撫躬自問必作有益之事數件
方不負此光陰遇事鎮靜終日無情容故他人每驚疑
未定而府君一言已決且料事多奇中然精明中常存
渾厚絕不討人便宜曾鐫吃虧圖章以自警處家喜儉
約衣帽但取溫暖登仕後始脫布袍然終其身未嘗穿
一華服自供不過腐菜常曰咬斷草根百事可做性極
孝先王父母在日旨甘必親調出外必屬宜人烹飪如

法所著有醒園錄人皆傳抄先王父六十雙壽大慶在
浙徵詩彙成部名曰鴻案珠圓道人竭水陸之徵以獻
旄因先王父愛田園之樂不肯就養祇迎先王母至浙
公退輒侍坐歡笑依依如孺慕友于最篤一飲食必相
共未嘗頽頽對宜人尤相敬如賓從未怒聲疾色教子
以義方嘗謂父子不責善故失禮處輒委曲開導不孝
謂元自服官以來所寄手訓較先正格言尤精故裒爲
一冊藏爲家傳以見府君無事不可對人處重族誼先
是獻賊之亂族譜已失府君捐資重刻自高祖諱厚而
下足爲五世作宗支派歌四句以相傳而捐地立祠堂

於雲龍山之脚買祭田廿畝清明埽墓冬至則演劇於
祠堂血祭畢合族綴食每歲爲例愛賓客至則豐酒款
洽竟日故蓬門外輒車馬喧闐與人交始終如一馭下
嚴而有恩隨才器使不苟小過故莫不出力思報而其
居鄉也尤能和睦鄰里有紛難者得一語輒卽排解好
周急乞貸者必量其意之所欲以與之負者亦不與校
親友相招者必步行恐騎從擾人也途遇鄉戚雖年極
少馬必下以是遠近翕然同聲兩遭大喪弔者數千人
半有不知名姓者亦盡哀而去時邑侯楊公嘗以事過
南村見百里內皆白衣冠歎曰此李公德所感也故每

出仕送三舍者常百人其得輿論如此其在官也總以愛百姓爲主從未妄出一票曰一點硃不要緊受票傳者必一路哭矣約束吏役甚嚴在直辦差所需車出自閭閻者雖甚澤槪屏不用但就各吏役家所有先使人查封再出重價以償既不誤公而吏役亦因以獲利故公事叱嗟卽辦且慣習勞苦遇有差委緊急事雖濶渡深淖每策馬先涉之陷大渠中濱死者幾數以是人皆用命在滄時緝賊不用健捕令四鄉里正就所知之犯稟報卽擒當堂給銀牌花紅以旌之鼓樂送出遊街故所在地方少兇脫之賊重讞獄不好刑求先使盡其詞

復虛畏以聽之必水落石出而後已有犯重罪者求其
生而不得然後定案往往有身在牢狴而焚香頂謝者
曰我死固當難報李公心耳以是上臺審理叅革重案
輒以委府君旣成信讞復經他員翻供者府君必面請
上憲另委賢員卒照舊案歸結如在保易簣之前所審
任某一案其明證也所著有治姚紀畧二卷精律例刑
名不請幕賓處繁劇一切文案皆手自批發嘗謂人曰
做官有六字訣眼到心到身到得此訣則聞人無權而
一應舞弊事庶可稍清敏於稟啓每倚案起草數百牒
直嘗苦不及與友人書寥寥數語而詳明周到蘊黃尺

蹟不逮也府沿素清廉兩次監密雲懷安城工及居府
關碑亭皆自携餅餌此地方供給皆不受卽家人亦不
敢受一錢是以上臺器重信服凡歷任府廳州縣十一
處承辦大工十餘起上臺每躊躇不得人輒曰非老李
不可先是府君垂髫時已立志爲名宦與羣兒戲自爲
假官旁列書吏皂役使兩兒設爲兩造客以訟呈有狡
黠不以理訴者卽變色重撲之羣兒往往受杖而泣先
王父窺之謂人曰吾兒他日必爲老吏觀斷獄可知也
迄今追憶乃知其驗府君工吟咏春秋佳日輒以詩酒
自娛凡鄰里過從招飲索留旬者輒卽席賦之所著有

石亭詩集八卷現任侍御劉乙齋先生諱天成爲之序
尤熟於韓蘇詩能暗背全集有手選各大家詩數卷擬
刊未果喜書畫官餘姚日召不孝調元譚元來浙攻書
延名師課讀以川中書少遍購古今書籍數萬卷以舟
載至家造萬卷樓以藏之命不孝調元偕已卯孝廉陳
諱灋者釐定正偽分經史子集四門編書目十卷名西
川李氏藏書簿作序以紀之曰此吾宦囊也畫則斷自
宋元明而下如趙倪沈祝輩真蹟尤所酷嗜鑒別尤精
見絹紙色卽能辨其真贋所著百餘軸製一大樹藏之
歲時一撫玩而已清算法歸除因乘俱極錯綜變化之

理居官時丈量倉儲有積年老更不能算而府君彈指
數聲毫釐不失者好騎射在滄州任時曹家等庄多回
賊私宰耕牛日則聚飲以爲樂夜則四散爲奸列任官
俱無可如何府君訪知忽三更起持弓矢率領健卒百
餘人突至其地悉擒治之不孝調元嘗以踰險爲諫府
君毅然曰豈有畏盜官耶調北路文武兼轄有額設捕
盜兵百餘人日夕操演躬自校射設堞百步每發必中
營汛弁員等無不駭服平居暇餘常率不孝調元及家
丁等於場圃較射曰此亦運甓之意也以故所歷之地
無不闢有箭道喜種花木自浙歸來築補過亭以爲優

閒之地以少隘又於祠堂前購一別業扁曰醒園丹徒
王夢樓先生諱文治所書也構造迴廊花庭數處有牡
丹臺天然床望江亭諸勝所藝梅杏桃李梨栗柑橘松
柏果幾及萬株外以土垣圍之使忠實僕柳發看守澆
灌曰俟我歸老必成林矣此吾天年之樂地也嗚呼痛
哉孰知十年之計已成而萬里之魂未返悠悠蒼天此
何極哉生前不留一言臨別未及一見大小數十口或
孤懸於塞上或散處於京師囊無一錢家在萬里冀冀
若此府君其忍棄不孝等而長逝耶嗚呼痛哉府君生
於康熙三十二年閏六月十四日午時卒於乾隆三十

三年十二月三十日卯時壽五十七歲原娶宜人羅氏
諱兆鰲公第二女以不孝調元官內閣中書 誥贈

宜人先府君去世繼娶宜人吳氏諱廷桂公女

誥封宜人子三長不孝調元巳卯科舉人癸未科進士
由內閣中書補國子監學錄 欽點翰林院庶吉士授

吏部文選司主事宜人羅氏出娶胡氏庠生諱昇公第

五女 勅封孺人例封安人次不孝譚元國學生娶

熊氏國學生諱曰復公第四女宜人吳氏出次聲元繼

胞叔諱化梗後庶母史氏出女二長適庠生曹諱錫寶

宜人羅氏出次適儒業何諱人鳳宜人吳氏出孫二長

朝礎十五歲不孝調元出次朝磐甫週歲不孝譚元出
孫女三長字現任劍州訓導何諱人麟長子次字壬午
科舉人呂諱林三子三未字俱不孝調元出苦次咽鳴
不知所云

崑山文集卷十九

綿州李調元甫村

四六上

恭謝

欽賜御製全韻詩及擬白居易新樂府摺

奏

乾隆己亥年五月十八日奉軍機處傳旨京提

蕭劉瑞年領欽賞廣東學政臣李調元御製全韻及擬白居易新樂府各一部到臣謹恭

伏惟我

皇上德叶韶謩道宗河洛創成鉅製綜

百六部全聲別著洪裁播五十章樂府洵矣典謨之

奧猗歟

功德之隆述

聖神文武之鴻圖風雲勳

色寓褒貶勸懲之大法日月長懸超三百篇而立則豈
有家能出其範圍彙四千載以成書將千古其尊爲圭
臬臣愚同捫篇學愧寒竿已幸叨玉尺之衡復 恩被
瑤編之錫荷 天慈之下逮榮幸難名仰 聖學
之高深廣揚靡罄爲此繕摺恭謝 隆恩

恭祝 萬壽百韻詩序

伏惟我 皇上紹統乘符循環立象顯清輝於斗極
受靈筭於泰元尺五雲霄雀獻昭華之珎大千世界龍
呈苑委之書固已月嶠含祥乾維效氣塵清九服外銅
鼓於戎亭瑞卜三登耀金船於靈沼茲屆上章之歲適

逢聖壽之期香動寶階榮生桂闕黃暉煥彩捧來五色之雲紫玉摘英鑄出長生之字合圖書者數千百所數文德者四十五年分和席以同春盡輪裳而稟朔而且西戎奏捷矢落天狼四庫搜奇字釐帝虎鑿空萬里秋生苜蓿之風採錄百家香動蒲萄之錦武功彪炳文治光華旣庶事之咸康斯一人之有慶加以詳求民隱懋復時巡飛芝蓋於南天啓紺轅於北闕半連齊魯河聲嶽色之間時協風雨葛葉杏花之外幾程綠水清是琉璃一路青山圍開金碧然而層慮方殷於澤國宸遊豈玩夫物華錫白壁以成河駐翠華

而望海蛟龍氣靜不馳竹箭之流烏鬼光清常見扶桑
之樹無憂蟻孔金隄則紅豆一條齊發魚鱗石鍵則雲
連百里況乃 恩敷赤縣膏被蒼生木鳳銜書芝池九
莖之路金鵝放赦草蘇三日之霖暢士氣於槐宮扇芳
草於萃野 青旂蒞止不費酒漿曜髮來迎報之密麪
揚壽考作人之化 道穆垂裳聽康衢順則之謠風同
擊壤維 帝包元而履德維 天墮祉而發祥是以波
動榮光山傳靈響千官劍佩遙承吉慶之花萬國衣冠
共諧昇平之曲 神符太乙合東西南朔以清寧星燦
長庚並日月岡陵而綿固生 聖人有道之世仰企

龍飛誦 天子萬年之章願爲虎拜敬陳篇什月代磨
歌

水清玉澗集序

老夫耄矣未能偕少年遊童子何知偏不喜與俗人伍
然南村晨夕長憶淵明東瀝風烟恒思子美則其勝事
有足志焉余家醒園舊爲石亭菟裘之所營成別墅似
在李愿盤谷之間然俯澗依岡勢雖空曠連巢并壘地少
紆廻爰因樂水之懷還作買山之隱人非東野地似西
湖引溜栽荷當門種柳閣以崇而櫺合徑以曲而花分
醞酒臨池可側山公之帽焚香掃石堪彈謝傅之棋于

以息焉亦足樂矣夫一邱一壑謝幼輿置身巖中半水
半山仲長統心遊物外此固幽人之逸致實亦曠士之
素心也然地有名山飲酒難逢知己人雖勝士吟詩須
對會家惟吾壻字號玉溪真同玉潤心無水炭却吹冰
清豪似元龍齊襟期于湖海俊同司馬倣意氣以雲霞
省試空冀北之羣一時價重訪余至蜀西之勝十日款
留維時秋雨初晴朔風未冽深林着屐高榭披襟坐明
月之二分當雄風於千里而吾壻每從容次和先得予
心抽架上之書嘗窺鴻寶探囊中之鏡早獲驪珠響出
行間不驚人而不止香生格外每遇物而偏工五字城

高得隋州之俊爽六朝體麗有開府之清新遂疑歌有
琴聲詩含畫意余也江淹已老愁無夢裏之花韓愈漸
貧空誇橐中之筆携百篇而登百尺老夫須讓出頭每
一題而歌一章此人不可無一爰取樂衛自相品題集
效蘇黃遂成佳話正所謂兼葭倚玉蓬華生輝者也則
讀其辭者當以薔薇浣手思其度者比之芍藥生姿矣
賦漢州牧胡一峯六十壽序

今 皇上御極之元年塵銷五嶽聽鐵馬而無驚慶
協三辰卜金羊之有喜臯夔在位鼎調水火之爭方伯
連州壘壯山河之氣澄清半壁上游無非謝公綏撫方

隅中間更多台父而我牧伯一峯先生浙水高門川中
名幕爰由卬郡移署繩鄉王休徵望重三公先著海沂
之績陳中舉名高一代暫收荆楚之功將大行焉有所
試矣乃若

先生神遊象表學架區中本自游龍所
至輒興雲雨常爲鳴鶴由來直上雲霄委屯務者三年
去則父老攀輿而泣從邊隅者萬里還則露布倚馬而
書障東逝之百川閩中之金城永固排西流之故道保
寧之全境無虞而且庠序粵新人文蔚起民風還樸訟
事不興昔處閒況之曹揮毫無暇今掌劇繁之縣游刃
有餘清心常湛水壺庭下時看瘞鹿妙用恒同玉尺案

前不爽燃犀用法無私不挫庖丁之鋒鏑臨文靡怙偏
翦旁午之紛苛方坐理于巴西春風爲之拂座追分猷
於廣漢膏雨遂以盈郊開門興子固之謠滿道感季方
之化東臯布澤牛不喘於田間北野徵糧蚌欲流於地
上是以前雨則甘霖立沛多稼如雲對民則霽顏以詢
三冬亦暖愛之如慈母敬之若神君論其德直上溯胡
公之屬而莫加論其清不啻祖胡威之絹而更勝譬之
光弼寧戎旌旗遂爲改色一若武侯作相壁壘頓以殊
觀誰謂治中不足展百里之才長史未可入九重之聽
也哉昔公琰負社稷之器竟掌鈞衡子通具文武之才

旋膺封爵而先生簪纓衍於當代圭組盛於列朝是以龍章龍錫白髮邀恩鴻案珠圍齊眉共慶增列三株之樹瑞氣森森屏列四照之花祥光靄靄也快聞弦於入邑已知趙軌能清及奉塵於登堂更識劉宏有禮蓋半生慕義久懷嵇阮之清而兩世論交實覓組羣之雅名傳黃口信今日所希逢頌比青天實古來之未有廼者戊戌之月將乞算於北辰乙卯之辰且注齡於南斗距黃花之九日序隔四朝當白雁之三秋筵開六秩滿城耆叟咸歡舞以躋堂闔邑兒童亦謳歌而遍野君子歌無疆之祉小人賡難老之章客盡持觥望青牛而

東度予將吹笛奏黃鶴以南飛矣

祝綿州州尊王雲浦六十壽序

蓋聞循良之傳兩漢列於編慈惠之師三河稱於表是以寵茲賢牧別造玉麟秩進上公專馳畫鹿然而事權不久才或未竟其心利器無分功或有違於志矣而况飛芻挽粟地當水陸之衝旁午軍書屢屆兵興之役非藉撫綏於召父難期含鼓於堯民茲幸 太尊雲浦先生用德爲才以仁行義靈鍾彭蠡廬陵本文獻之邦派衍瑯琊豫章實多材之地杏園對策摘文丹鳳樓前綦水鳴琴建績冉驤境上遂領瀘江之重鎮迭署重保之

名都三捷名傳美書生乃能辦賊一麾不次信

天

子不肯負人由資而達而忠幡能屢度爭裁百尺之棠
由茂而酉而綿竹馬初迎已秀兩岐之麥或謂公清若
冰咸言君惠如膏比人在於鏡中神明可感若兵過於
席上保障無憂不知存不忍以爲心本無私而出政憫
勞人之已困惟愛人不致傷人識多事之維艱欲省事
遂成無事何賴破柱蒲未試而先威罔待投書薤相傳
其自拔冰壺皎潔笑劉龍何用一錢玉尺溫良較廉公
寧唯五袴化行無欲績報有成茲當星見之期其獻日
升之頌人皆云年豐由於人壽而不知家慶實承國恩

蓋先太翁由黃甲而登黃堂爲父子一門之盛事故
我公旣善繼而兼善述居兄弟兩難之中問唐棣叶
翩反之華同居實同張藝井曰得齊眉之助相敬無異
孟光以故膏雨和風四邑之謳謠旣遍而怡聲柔色一
庭之孝養彌歡蘭桂森森無非廟廊之器芙蕖葉葉堪
充獻壽之杯耄叟咸踴跳以躋堂兒童亦懽騰於道路
將見頌無疆之福盡四邑以皆然履難老之詩合萬家
而共祝矣

祝周母鄒孺人六十妣孺人五十合壽序

南邑風號名區周氏尤爲著族相承朱紱代有聞人獨

富青箱時多秀杰自郴州公辛酉鹿鳴與先君吹笙鼓
簧之誼嗣文安公庚辰龍變復與予訂投編贈紵之交
因悉棣鄂八人俱有元愷之目中雖桂攀三雋不出厨
俊之稱樹在階前珠皆照乘珍當席上玉盡連城竊嘗
歎此寧馨乃復聞其懿行則鄒姚兩孺人其家事有足
稱焉鄒孺人系出考父籍居武昌幼毓蘭蕙之姿早習
蘋蘩之訓振佩出延陵之室將車歸江夏之庭謝馬氏
之資裝偏能椎髻操梁家之箕帚但遇澣衣洗手調羹
獨得

之忤齊眉捧案恒同君子之心姚孺人家在

蓄德早著聲于三黨承歡尤盡禮于

前咸推櫛士每縫裳于牖下亦號針屏雁
借弋將雅叶彈琴之操鹿車旣挽爰修提甕之儀問夜
相求聞鷄有戒登堂饋食叱狗無聲凡此皆兩孺人闔
範所由來爲閨闈之創見繼因長尹迎養高堂旋聞
舅翁已捐館舍一則四子年甫垂髫一則三兒齒皆黃
口廿年夜雨鳴機同和誦讀之聲半世秋風斷杵共警
搗砧之夢養雛成鶴誰憐寡鵠淒涼有子雕龍肯惜和
熊膽苦六十年之歲月罕窺喜怒之容五十載之風霜
辛盡劬勞之力是以鯉庭奉教圭壁之譽日隆鸞案
無雙鍾釜之怨不作由是立身行道皆因晝荻之所成

卽此顯親揚名難保充參之所得洵足配美於栢舟尤
堪流芳於史策茲者月當孟夏歲在甲寅兩壽筵開啟
璇堂而懸彩旆雙逢桃熟帶玉筍而舞斑衣鶴髮宜年
欣逢添屋龍章錫嘏喜見開樽而兩孺人膺三錫之榮
神明益茂備六珈之禮齒髮未雕顧我不文虛備官于
太史念予世誼許效祝於華封爰從雲谷之書兼讀書
翁之序乃拙鬼穎用啟鮑顏昔曹大家之淑範用享高
齡宜文君之令儀因登上壽况乎三鳳旣鳴造樓尚餘
五鳳雙龍同躍下食還有六龍佇見兩兩邀封起居八
座重重待祝遙賀百年矣

祝張太翁劉孺人七十雙壽序

蓋聞書稱五福並美遐期詩咏百年同推洪算是故金
公木母流傳曼倩之桃椿樹萱花並紀安期之棗欲知
無美之不具須識有開之必先惟我敬翁太先生系出
清河家原鄰水青虬馭節萃維嶽以來歸黃鶴翔軒應
列星而誕降門垂舊德戶啟新祥夙負英姿幼惇至性
馳芳聲於學校國士誰雙振異采於詞壇文章罕儔關
西夫子盛德堪儀東郭先生清修足式燕山萬竈常信
晨炊薛邑千緡每焚宿券排難尤推郭解驚座不減陳
遵至于懿訓睦姻家敦孝友春秋逾劬日月彌高尤其

里誦太邱之賢州崇叔度之化者矣至於內助維賢實與外言無間如我劉太孺人陶唐之孫代多賢士彭城之裔世號華宗早著令聞夙嫻閭範柔嫻慈孝出自性成言德容工不從人授旣鼓瑟以合瑟便舉案而齊眉南阮名流不繫情於犢鼻仲卿佳士豈嘆困於牛衣躬親操作寒暑不辭身任勤劬晨昏靡倦紉箴佩睨曲承堂上之歡饋食餉田詎慚廬間之事而又熊九佐讀畫荻陳書雖同鄒母不煩徙宅之勤未投雷池竊慕封鯨之意抑又可以兼郝鍾而較勝軼桓孟而無慚者矣凡此儀型足追往哲仰茲懿行定啟後昆以故篤生令嗣

偉爲望人素號書倉久推學海蜚聲黌序居然荀氏之
龍挾藻文壇不下邨家之鳳選膺青錢之薦獨奮垂大
之雲獻雖白玉之三終破乘風之浪惟其鯉庭有訓是
以鵬翮終騫久坐鄭虔之瓊常思視寢忽捧毛生之檄
得慰承歡迄今丁酉之首春正居高堂之七秩人聞壽
域天錫昌辰錦筵麗以初陳異香遶而不散衙開薊北
梅芳競曙雪之先瑞滿燕南介酒恰元宵之後借竹馬
兒童之舞全當老萊採杖鳩父老之謠移稱杜母況夫
嶄然頭角盡是渥水之駒森爾蘭芽都是藍田之上金
甌潑水玉尊傳觴斯亦東海不足以添壽南山不足以

童山文集 卷十九

此福者矣而乃九重錫詔頻膺紫泥之封百姓傳觀
永作黃髮之式斯時也賓從如流榮華似海董雙成之
贊瑟調發雪璫王中散之行厨肴陳麟脯即使他年集
福應期願而更多何況此日同栖又駐顏而返少也哉

童山文集卷二十

綿州李調元甫村

四六下

祭諸城相國太傅延清劉文正公文

嗚呼地折幽燕山頽泰岱仰泰階而曉落指台宿以宵
寒九重聆訃而咨嗟臨朝罷講百辟聞薨而震愕奔
奠盈衢蓋隕厥元良同普天之所共慟而喪其表帥尤
羣屬之所私傷惟我相國裔接陶唐族高齊魯秉清剛
之正氣挺純粹之明姿早馳譽於清華歷邀恩於上苑
論遭逢之盛蓋漢唐名相之所絕無溯功業之隆實姚

宋諸臣之所未有當其應期命世維嶽降神穎異少年
飛騰中歲浩浩百川之學汪汪千頃之文金殿臚傳羽
儀三署玉堂佩委袖領羣仙四海期望夫東山三廳競
推夫南薰書拙烏册五丁能役風雷錦出龍梭六朝不
誇月露北門實資鎖鑰東觀盡博圖書金馬承明鳳詔
宜從平楓陛瓊條揮羽鸞坡路接夫槐階遂爾聖眷
彌英天綸重播採花秋實白鳳鳴屏輔翼春闈黃鴈頒
賜內廷入直早知頗牧之在禁中當殿宜麻爭傳許
燕之立朝右至若容臺秉禮麟閣推三禮之宗重席談
經虎觀重九經之庫詩歌則陶情寫意歎玉溪昌谷之

非工纂錄則摘之奇哂夾漈貴輿之未博石渠諸子
聆而傾心金匱群儒望而咋舌况復平衡乎水土因而
敷歷乎外中位應三台淮海望中丞之節階崇八座河
隄行使者之車洪荒免百姓之魚舟楫救陽侯之怒功
齊神禹治贊唐堯若乃衮衣繡裳借哲人於臺閣朱旗
絳節資文學以保釐如馮翊之屬蕭比潁川之借寇民
悅來蘇之雨士瞻采芑之風建牙據察吏之猷胸如觀
火弭盜著安民之畧面若凝冰至於屢掌積運之權暫
綰挽輸之寄鄧國足關中之粟武侯屯蜀地之租身臨
貔虎之軍月明黃鉞念切麒麟之象雲掃白旄因遺大

而投艱遂懷遠而柔邇惟不爭乃能不辱知奇事必出
奇人富夫歸入九重位高百職身鄰斧戾口吐絲綸
眷風重於覆甌任獨隆於和鼎陰陽隻手玉燭調宇宙
之平霖雨片言金鏡納乾坤之大賜第堯連平樂入
朝兵衛羽林面折廷爭人憚王陵之態老臣卧治

夫憐汲黯之忠東閣儒生經筵而推老宿西番會長來
朝而識大人洵爲名世之鹽梅真是熙朝之鼎鼐由是
兼綜部務總攝卿僚本屬宗伯之總曹長典秋官之重
寄恩流丹筆先立平反之科望重白雲人有不冤之頌
正刑糾慝國無害馬之倫翦暴詰奸市化飲羊之俗迪

乃位隆冢宰權重平章爲天部之表儀作周官之綱領
百爾咸歸董正六合仰藉衡平月鑑空明懸秋宵而益
朗川流澄澈當潦盡而彌清正以率人不諶清平之致
玠公以持已自嫺無滯之裴王此其激濁而揚清尤屬
超前而絕後蓋嘗親炙公之丰采摠計公之清操履忠
順以事一人持庶節而光百辟獎忠直而真材屢進
懲貪污而世路肅清默握樞機皆匡主濟民之畧申
明典制多安邦定國之謀終始完名寰宇瞻其丰采後
先贊治朝廷重其典型因其庶績之咸熙益至百揆
之時叙以故兒童皆知司馬蠻貊亦畏王商西京則爵

時蕭曹北朱則名齊韓富賜書班固代有文人傳授韋
賢家傳名相五十餘年三省魏重咸陽二十四考中書
唐稱尙父陸敬輿之外王內聖有以加諸李文饒之選
服適安無不逮也宜乎商山四叟歌眉壽於封留孤竹
二君頌大年於釣渭耆英有會非曰一人之私元老長
留實乃百姓之福何意虞淵已死綴嶺終遙豈真聞朱
鳥之來臯比忽而坐化恍若跨青牛而去鷄鳴遂以無
踪嗚呼虎賁無可似之形羊曇有不由之徑客來床下
淒其百尺之樓士集府中聞若孤懸之榻真百身而莫
贖邈千載以何追某等夙荷栽培素叨陶冶仰平平之

無黨實休休而有容曲者輪而直者輶大匠初無棄物
瞽司鼓而聶司守至人亦許隨材以故眈眈而附風雲
便生毛羽唾咳而濡雨露不惜齒牙名愧機雲幸受知
於唐武才慚錦岱謬見賞於平原椽竹知恩爨桐感遇
欲作冲霄之侶誰爲二賓聊爲遇雨之人衢同五父向
寢門而雪涕賡華屋以淚零帳述德之矣窮撫中懷其
若割敬陳些語聊薦溪毛

祭曹三槐文

嗚呼芙蓉館主誰擁丁度之車遮須國王先寄劉聰之
信上天作記李賀終亡下地修文卜商遂喪駕緱山之

鶴翹矣白日飛昇網葉縣之鬼遐哉青霄遠舉此固洪崖之亞思舉手而謝時人抑亦許邁之儔忽穩坐而成羽化然而景仰前型何勝隕涕追維盛德可禁漣洏竊惟年伯大人孤竹名門晉陽華胄先卜居於螭螭之塞遂定居於鷄鹿之城秀比藍田美如冠玉書通六甲史足三冬練王氏之青箱牙籤風動人馬儒之絳帳錦繡雲生試輒冠軍羣夸繡虎才堪倚馬並羨雕龍鄙月露之形別成六經之鼓吹挾風霜之氣洵稱五典之笙簧偶逢白樂之知遂傳燕許手筆既識荊州之面方知屈宋歌詞雖屢薦而失李薦已撫腹而咏邊韶學道王通

何殊講義於河北明經楊震無異占象於關西玉石無
淆不使濫竽之吹膏資有給寧偷鄰壁之光靄靄占人
羣沾和風之惠濟濟多士咸沐化雨之恩望關里之降
崇使人人知由義路觀宮牆之峻整亦處處共出禮門
儒者宗之士林仰矣乃鄭虔之瓊可坐茅容之饌誰供
爰動風樹之思欲採白華而致養旋痛蓼莪之廢徒樹
萱節以忘憂誰知芝草中摧遂致松柯遽掩月照啼鵲
之血風酸孤雁之聲哀旣死而復蘇毀亦痛而幾絕卽
此真情在我豈非至性過人蓋其立身行己之大端固
已超乎儕輩而其養生送死之大節尤爲卓絕乎羣倫

者也所以積善高門慶衍先代居躬樹德佑啓後人珠
樹照映於庭闈芝蘭並秀於階砌擬竇家之桂枝幹扶
疎似王氏之槐柯葉繁茂或駕鵬程於萬里雙題雁塔
之名或觀鴻都於九重並揭螭碑之字譬之合浦並見
珠生擬以崑岡無非玉產踵前規而益懋沐家訓於凜
遵長君作宰秀山循聲洋溢乎南詔次君出牧滄水清
名遍著於北燕而年伯大人觀此心怡顧而色喜優游
林下樂有影之烟雲嘯傲村中受無邊之風月山間蠟
屐耽野趣之長水裏雀舟占田園之樂每當化晨月夕
了進霞觴常隨紫陌青街孫扶春杖真堪樂徜徉於仙

里長翱翔於帝都者矣何昊天之不弔致哲人之云亡
塵栖不撫之絃月照無人之戶哀哀令子拭淚迸淚啞
啞女孫撫心痛悼某誼忝年譜之末素仰先輩之型雖
未獲列後進之班趨聞提命猶幸得從嗣君之後側聆
訓辭方仗表率於寰區誰謂仙遊於天上嗚呼乘白雲
以極目淚洒高天登赤霞以凝眸魂消厚地未多樽酒
遙酌馬鬣之封愧少生芻敬結駒維三慕

示諸生文

責實循名同貴青錢之選除奸剔弊尤嫌白璧之汚仰
惟聖天子推崇學校三年而計以成功特選臣鄰

一旦而予之重任司文事者洵宜矢慎而矢公爲學中人更當相規而相勸事欲勸夫後効令不憚於先申今本院例在應謫之條蒙 皇上疊加不次之擢皇華之命再到爲難 特達之恩從來未有奉 紫宸之聖訓心凜旌旄每清夜而自思涕濡枕席期効涓埃之報故宣藥石之箴往者恭膺 異命至粵典試午闈思採白沙甘泉之真傳欲步昌黎東坡之遺範珠江瓊海堪狀文瀾梅嶺羅浮實多鍾毓一班之玉筍曾收百越之青衿繼起今復忝持衡尺自問敢詡甄陶不過弟子之就正於師無威可畏莫言今人之遠不如古有志

竟成大抵試案之程以文爲重採風之券以行爲先禮
樂詩書修之家者獻之國忠孝節義坐而言者起而行
然後採藻摘芳無非堅根固蒂誠以旣爲四民之首自
當仰希百世之師五典三綱總向此中立根腳六經四
子須知以外盡支流制行果屬端方吐詞須遵典則王
唐歸薛成式未遙韓馬熊劉垂法尤近文惟其是清真
與雅正齊登理酌乎中淺陋并艱深必斥總以發揮聖
賢之蘊不在摛撫子史之辭經解則一本 欽編未可
桃唐禰宋古學則兼長博物何妨陸海潘江較武果有
出羣之英豪本院定加從優之獎拔所慮者覆壁深岩

偶失向化通都大邑尤易藏奸雖然逆億無妨但恐賢
愚不等其或賦性譁張行乖倫叙居鄉武斷名玷公庭
尙仗紳衿挺身唆訟稍通筆墨作弊舞文甚而訕謗譏
評妄誣時事詩詞文字不凜王章頂替而代爲捉刀
倩傳而兼之挾策躬不恤矣恥何有焉此皆郊遂之必
移豈容冠裳之濫厠至于定期考校更務肅我場規卷
有犯法之圖雖佳必黜場有交頭之語雖小必懲甲乙
面評決不移定衡於察幕早晚日照尤不仗查察於騶
鈴得失本功名之常原宜靜聽是非有文章之價尤禁
誼譁至本院鄉關僻處並無豪貴之親朋寒素家風絕

少寄居之宗黨其或匪人劣棍圖撞木鐘指官招謫時
或因乎一面借名索騙貨竟不惜兼金藏跡捕風遍流
其毒含沙射影莫測其形偶或有此一條定難逃夫二
尺至於桃李舊植本屬公家之栽培冠履遠嫌豈容私
門之請謁入境以後收刺已令概辭考案所臨見諒各
宜隱避凡此諄諄之誥誠無非種種之苦心特爲早言
無貽後悔本院計年樹木漫粵多士於三千庶幾爲國
得人借報主恩於萬一

萬卷樓藏書目錄序

蓋聞東南世族家有簡編摺紳先生人稱掩冷樓成蒼

弁葉少蘊富矣藏書閣號清森何元郎多兮揮架或誇
連屋絕勝擁城吾父捧檄姚江王陽明講學之地烹
鮮繡水陸忠宣桑梓之邦景仰風流雅懷稽古操持冰
潔不羨金篇爰積分俸之餘時切傳經之意搜來兩浙
江外藏諸萬卷樓中蠹簡芸編零星拾得縹囊錦軸次
第裝成敢云盈茂先之車聊可比鄴侯之架無勞懷餅
庶待燃藜調元七業未成四經不就一丁粗識無異宏
靖課兒二酉偏觀實懶賈批教子惟恐牙籤飄動移時
莫識甲乙丙丁用是緇裘標題今日先分經史子集堆
之槧几敢辭鉛槧之功守作良田願效挈瓶之智

塔水塲駐防馮君四十壽序

蓋聞崆峒倚劍天漢投戈行武不乏英雄壯志猶推矍鑠嗣桓武而媲美鎮重北門頌聖考以凝床星輝南極伏惟駐防馮君世居栢鄉望出上黨岐西華胄畢公沿十五之傳河北隆名魏萬分三晉之統迄洪武而分司西蜀追萬歷而松潘遷常山之故都居龍安之屬邑祖爲副將賜書爭日月之光伯授撫夷秉鉞凜風霜之氣惟公少懷異質穎不露于處囊長擅英姿才獨精于刀筆分司塔水憑眺神泉望署彰明興懷廉讓持戈殺賊荏苒之鼠竊亡殲仗劍驅奸郭溝之妖氛迅掃禁

博兼之除暴緝盜卽以安良他人未能勇行而公了無畏却今日堂前進酒時值強仕之年他時帳外談兵預卜遐齡之算更可喜者屏開孔雀光借瓊玉以相輝帶綰鴛鴦並附絲蘿而共結宜家宜室離離永叶鸞和而熾而昌奕奕長綿麟趾且又箕弓裘治欣看繼起之賢手樹芝蘭早發階庭之秀轅門射戟爭羨公子登科泮水生香咸稱祖宗德慶際茲乙亥之十月已遇甲子於四利遠近鄉紳咸頌無疆之祉市廛商賈共賡難老之章觀多慶於門闌三重喜報懸弧矢于戶牖五福駢臻

昭覺寺道院禪師年譜序

蓋聞神通勝業非定不生無漏慧根非靜不發攝心一處便是功德叢林散意片時卽名煩惱羅刹然而風裏之燈影既不現波中之月照豈得明故降伏四魔金剛有時努目慈悲六道菩薩亦爲低眉惟我道魁禪師者家住黃陂系出童氏身如明鏡法號了元少而精明夙秉靈慧長而好道早悟玄機耿直片心有排難解紛之概剛方自矢秉鋤強就止之風謁漢鎮之明師脫身入定受明禪之指示落髮灰心夜則朗誦曇花晝則時披貝葉遂繼領於昭覺兼開講于草堂萬化圓通早受廣師之戒一塵不染遂嗣圓悟之宗破巨浪以乘風雨飛

南山文集卷二
南海之錫穿雲霧而見日一了西川之緣歸來十五春秋譚經三十六載雖其人已經其語猶存琢句風清見冒懷之滾滾浣腸月冷寫逸興之涓涓倘非彙之日編何由綴爲年譜此釋迦譜系紀載必出乎衣傳猶儒氏言行纂輯多由于門下也時維秋盡節界冬初有宏遠之高徒託禮訂之令弟持其兄札懇乞余文竊嘗觀其語錄覽其遺行實大振乎宗風因宏開乎象教立凶年之賑濟普渡衆生嚴早暮之戒條長留規約重樓登閣不惜萬金之貲鑄釜鍔鍋竟造千僧之灶又豈徒三乘四諦探覺性於空虛五蘊千門契純真之法界也哉

附

寄雨村老前輩詩啓

侍讀學士 王懿修

春甫青陽

啓者記竹林之雅集曾附濬冲仰天上之謫仙羣推
太白頃來雁使得捧魚牋知聯語早奉記曹而扁額
尙邀台命更荷遠投珠玉正如親接芝蘭惠以好音
欣同良覲伏惟 老前輩大人英辭絢爛壯氣騰騫

以西蜀之淵雲爲南宮之冠冕翰林風月吏部文章
秘府抽思固早播詞頭之譽公庭論事寧徒署紙尾
之名曾擁節於皇華旋開堂於綠野捫參歷井流水
行雲峻望岷峨豪情湖海編玉溪之花萼記德裕之

平泉鄴架圖書細叅亥豕膺門賓客劇會雲龍崇大
雅以扶輪遍傳詩話聽康衢之擊壤亦寓文心庭自
傳經門多問字固行一多方抑賦閑才獨異侍弟
僑寓修門倏臻老境自慚蒲柳敢比松筠謹賡絲韻
六章漫作窠書一幅相思千里寓投報之深情久別
十年思唱酬於往事溯潞亭之秋水許附仙舟對蜀
郡之花箋長思彩筆

寄呈雨村老夫子啓

門生 溫承恭莊亭
德慶

啓者竊聞梗枿杞梓材歸削墨引繩墀璧琮璜寶在
收名定價耀黼黻文章之色青必出藍煊燹山粉藻

之觀白當受采短長合度玉尺須量小大皆鳴金鐘
待叩迄傳書于黃石橋邊孺子頻來思問字于元亭
酒畔高軒遙企伏惟老夫子大人輪扶大雅陣鼓
雄師唐宮李嶠司文晉代山濤啓事著述罄南山之
竹都鍊京研聲名高北斗之星顏陵謝鑠一枝麟管
校餘七子才華千仞龍門分出八厨聲價鴛鴦繡得
徧度鍼神荳蔻描來頻傳花樣充物溢珊瑚鐵網璞
玉渾金漑沾流玳瑁書裝殘膏牘馥十二閑之驂騑
騏驎施鞭策而盡騁天衢九萬程之驚鶩鵬鵬假羽
毛而皆翔日下出頭放士宋永叔自古幾人說項憐

才楊員外當今一个

承恭

青袍恨積紫硯辛穿長箔

一聲年少則時名謬竊英才五字命窮則科第淹遲
積風雲月露于箱中桃花紙滿繪草木蟲魚于筆底
艾蒻香薰自知謫陋堪羞皇甫謐之撐槩少讀深慮
沉淪可惜斛律金之勅勒思傳雖覆既見輕挪掄有
鬼豈愈風驚起賞識無人史併羅胸回憶齒牙曩日
呂亥德慶以父父二字命題
荷蒙拔科謫直書宮第一文權在手肯埋頭角斯
時禮易詩書幾篇帖括歌行律絕半冊風騷走盤而
粒粒不圓珠亦明知九曲刻楮而硜硜易碎石偏惜
是一卷水乞翦夫吳淞雲望生于點綴金淘沙磔齒

化神奇河東之彭寵懷慙豕獻白頭曷貴冀北之孫
陽下淚駒當驟耳爭傳鼓擊雷門萬言敢試評登月
且一字祈褒緬私叔于諸人期有造乎小子步趨未
接款曲遙通嗟乎紅玉深藏那知太璞綠珠不嫁總
似無鹽年年第下劉蕡激昂誰問宦官之策歲歲放
歸韓愈刺非多咎貳過之文倒縐孩兒雖繡虎而比
同續狗此間傖父縱雕龍而視若塗鴉方雄飛豚栅
雞棲久後纔傳其句陸魯望酒旗風影當時少羨其
才此不躍不鳴寒士所以焚囊而感慨亦一練一字
古人所以塑像而埋沉者也嗟乎象罔今稀投暗之

珠擎宜祕豐城人在埋光之劍發須干蓋俗儒惟知
引故衡材而明哲別出風塵取物序鶴鵠于阮籍曾
聞藻許張華成鸚鵡于正平不少狂憐文舉况暗中
摸索年輕曾荷青睛寧行卷請求晚落轉施白眼得
一不恨酣酒常呼拔十殊多望塵欲拜號門生而弗
敢柳州悲憤壯夫有所不爲與暨子以成名安道游
揚下士聞而大笑宰相之書不上我豈妄哉辨香之
祝偏殷客何爲者毋供諧謔放布腹心

寄謝雨村老夫子啓

溫承恭

啓者竊恭身附青雲畢生至願曲孤白雪屬和終稀

自知卷石殊頑敢道此羊可化誰料解衣見泣偏容
鹽驢高吟草收歸詩話之中墨花並賜錦囊之作
此蓋老夫子大人栽來桃李一心護到開花網過珊
瑚兩眼真知是寶亭皐木葉有興頻哦金星海棠無
香不笑集一狐之腋裁成六尺之衣修五鳳之樓採
用短長之木洵嗜痂而有癖比享帚以何如喜却生
狂情惡能已嗟乎晏元獻禮尊比面難拔希文牛僧
孺詩謂後塵不憐禹錫三都僖父左思賦笑平原五
色戰場蘇軾迷慙李薦表獨披沙屢揀敗鼓兼收風
簷耀童穉之文當年入選山石拈女郎之句此日新

鵲姓名附著述而長存作序之鵲鵲弗似詞賦教流
傳以其見能言之鵲武皆驚知已相投何但磁針芥
塊美人圖報豈惟玉案金刀顧明月不見蛇豕而重
山空令鰲戴腰橫雙劍不如衰老候羸淚酒一莊長
歎荒涼陸贄竊自傷矣尙何言哉爰思日月推崇曾
見杏壇弟子因合淵雲作頌徧徵梅嶺英才和叶鏗
鏘先唱在陰之鶴贄邀游夏畧酬顧紐之龜詞編律
絕歌行譽重秋陽江漢雖一坏捧土何加尼父之山
而萬里揚風竊播袁宏之扇伏願老人子大人窮憐
東野之鳴甄陶諸子香敬南豐之祝眷念鄙人無力

謝青磨蝸命真可慨從何表白靈犀心冀相通莫云
崇奉虛文所吐無非實語三薰二沐倘或傳爲佳話
連篇累牘珍歸一字一縑噫天下文章歎夫子之不
可及老夫衣鉢問斯入其誰與歸

特呈雨村老夫子遊蜀詩序

溫承恭

僕少負詩名宵羅二十一

史十六受知十雨村李學

之譽長慙科目命窮二十五年羣英壓自考棚科歲

四膺領袖時藝鐫于試牘文章屢入選樓

平曹周恭
四學急試

皆援第一經術辛勤敢紆青以自信遭逢蹇滯竟脫

白之誰憐蘇東坡未放出頭良可悲也李北海爭來

識面能無愧哉笑彼顏標豈尙聽冬烘之顛倒好從
校尉還思効弓戟以馳驅中原當用武之秋采薇歌
作下士值談兵之會細柳營開黑闥黃巢寇閩襄陽
河內長蛇封豕氛連宜漢褒斜豫楚巴秦五路之鼓
聲並震旌旂矛戟兩年之烽燧頻燃龍尾占星籌紛
借箸虎嶠踞地射聽遺書客有何人公子新求朱亥
才需此日趙郊恐失左車終子雲弃繻出關請纓確
知有路毛先生處囊脫穎見末更待何年倘任噉字
咬文吟風弄月遇合乞靈于詞賦屈伸聽命于主司
惡知鑪鐵千言不負寒臄燈火未必治安六策終爲

用世絲綸趙南星筆硯欲焚酸辛涕落班定遠毛錐
不用踴躍情豪毅入多年寧任英雄短氣材非棄物
那容迂腐嗤人關河倘訪文淵請聚山川之米藥石
如求仁傑應登參朮之館故險閼蠶叢不妨裾還暫
曳而棲依鷄障還期有志竟成嗟嗟丈夫坐歎雄飛
誰識趙溫慷慨老母寄留遠志總教伯約淒涼萬里
奔馳爾日之熱腸隱結十年牢落何時之屯留終更
魏元成情托迷懷感慨悲歌漫道君勿後爾子建表
求自試雄才大畧曠能我駕馭卿請自臣狂尙希人
諒

寄呈雨村大人啓

門生 荀組綸 謹啓

啓者恭惟大人北斗人宗西川物望茂年對策雁塔
題名早歲含香鶴廳聽政風流儒雅煥五色之羊城
月旦衡文探九苞於鳳穴握金針而造士秉玉尺以
量才施化雨於南蠻適觀風乎東粵焦桐在爨飾以
金徽枯竹辭亭珍於玉珩文真變豹士獲登龍乃以
果達藝之兼得清慎勤之要文揆武奮廉車伏觀察
之司義震仁懷集節寄保釐之任來蘇是望方欲殺
我以此邦過化非誣尙冀借賢於斯地膺旬宣而登
殺雞并翰而重來雩偕童冠而乘風門等游楊之立

雪請業請益函丈周旋亦步亦趨崇墻晉接事雖有
有願立全虛胡乃上官不容強項遂今下走竟憚折
腰乘犢駕以返南山雅耽鉛槧著鹿皮而歸西蜀酷
嗜縹緗具論世知人之才極窮情寫物之識張敬夫
之篋裡饒有異書楊子雲之室中率多奇字典墳之
富踰彼劉歆評騭之精加於荀勗斯則景星慶雲之
覩莫不仰其光儀鳳凰鸚鵡之女未足方其品格者
也趙編馬磨寒儒鷄窓下士合一十三學之選倖登
於前領二十八人之班竊冠其首諸生鼓瑟別技均
收仲氏吹塤榮施濫及弟趙綸人州家憲取學敢自號爲佳士

竟肇錫以嘉名英才 賜盛世星巖則偏許從遊憲

七星巖練渾則頻呼唱詠憲過渾應有五言律句荆

草備籠中之藥砥礪同席上之珍得與語而見知死

何足恨徒讀書而失業生亦為狂嗟乎虞翻之骨相

偏屯宏景之頭願已老守青箱於累世荒豈破天恃

白戰於數科敗真塗地得而弗失氣已竭於再三蓄

而不通年且惡夫四十而且空囊羞澀併之一錢負

郭荒涼曾無二頃椿樹既枯於東漸豈花尚茂乎北

堂即欲負笈以從未能絕裾而出爰是學詩而呼小

子怨可以羣鑒易以見大人奇而不偶肥暴壯載相

逢皆雞肋之棄餘舌耕十年所到等猪肝之是累深
爲自愧罔藉人憐然而倒樹朽根念栽培之有自攀

鱗附翼欲就正以無由乃小阮方栽花於華陽

姪念高現

知華陽

縣知縣而莊亭旋曳裾於梁苑

原生溫承恭赴華陽縣署

書呈馬

帳往復僅爾怱怱神溯孔堵歸來直呈縷縷五言共

獻俾詩話之咸收七律遙將實詞壇之足貴賜同人

以諸親三復維殷擲獨子以今觀一辭莫贊恨不親

聆謦欬得以叨附輝光顧執轡未服其勞捧生何加

於譽敬呈俚句嗟乎仲尼之教弟子大抵詩書禮樂

之常維靡之小文殊應在文字語言之外

童山文集序

今之刻文集者莫不請當代名人爲序蓋欲人之譽已不欲人之毀已故借名人以傳也其實傳不傳不係乎人而係乎已已果可傳歟人雖欲毀之而不能也已不能傳歟人雖欲譽之而不得也余老矣才華旣退學問亦荒況杜門已久亦不知何者爲名人于謂旣在所禁求諛亦覺赧顏譬如老牛謝犁惟思卧嚙枯草終老天年耳安能與少年騏驥共爭名于天壤間乎且序者所以序其事也而世間並無所事文者所以揚其名也而林下將焉用名惟與候蟲時鳥每遇風日晴和啞啞噴

噴所謂得一日鳴一日而已故不如自序之爲是也嘉
慶四年十一月初十日童山老人李調元白升

水自州北龍門壩入境。未至州十里析而爲二。一出北岸龜山脚之宋家營。繞州前與芙蓉溪合。一出南岸烏木椿。遶州後與安昌河合。前後二水均瀝於南塔山下之老鷹灘。曲折而東。此時若欲修築舊城。恐涪水兩路夾衝。旋補旋溢。勞費無功。良不易也。今自康熙冲決後。涪水全勢盡由宋家澳一直南趨。而東北一帶刷成河道。昔年冲塌城基。現沒江心。卽今廟基嘴灘地。勢反居窪下。其西南岸雖屬臨河。尙寬五百餘丈。形如壁立。而望江樓一帶水勢俱屬湍流。地亦高爽。永難冲激。雖舊制稍改。形勝猶全。富樂之勝依然。鵜首之星如故。止。

彌縫其闕依然一大都會乃不此之圖而議建議遷毫
無定見忽於三十四年詳明前督阿奏准裁汰羅江改
移州治既不相度形勢又不細察民情以羅爲綿已屬
張冠李戴以州改驛未免主弱臣強豈不惜哉吾州尊
劉公者諱印全字慕陔江南常州武進人乾隆壬辰
進士也由資陽令陞合州復由合擢綿州初下車卽絕
苞苴嚴賊盜萬民乂安但以羅去舊綿太遠每有鞭長
莫及之歎而亦無可如何嘉慶五年正月教匪卒起偷
渡嘉陵江二月漸逼潼綿公聞報卽率鄉勇趨至金
山驛晝夜堵禦寢食俱廢又見城垣破落卽日稟請

大憲倡捐銀一千兩米五百石。卽於十四日動工。一時
輿情踴躍。鳩工運石。無不奮臂爭先。予時方避寇成都。
見公與趙太守書。議築綿城堵賊一事。嘆曰。予固知
移州之非計也。旣聞四鄉士民陸續捐輸。計銀四萬餘
兩。不匝月而工成。時烽火已近北岸。百姓紛紛攜家進
城。幾至人滿。總督大營亦移住金山驛。對江逃民呼號
喚渡者萬餘人。公請救之。大憲疑賊雜其中。公毅然自
任。親自過江。拿篙驗渡。俱令過江。避賊民皆大悅。呼爲
劉青天。余嘗詠其事云。百堞能容千戶住。一航先救萬
人生。蓋紀實也。未幾德將軍參贊兵至。擒獲賊首解

省寸磔。餘賊見金山防守嚴密。不敢過涪江。從泰和鎮
偷渡。四月初二日。賊被德兵追回。亦不敢過金山。從下
流楊家灘。涪江而遁。淹斃甚多。城遂保全。皆劉公力也。
先是以綿移羅。以至官無正印。迄今三十年來。綿人無
日不思復舊。至是。士民立書請。即官回綿。慮及長久。加
開甃砌。至十月完工。崇墉堅固。又於城外用石添築大
堤。渡口釘砌人字小堤。俱增魚嘴。重重保護。周圍共築
城計九百八十餘丈。高一丈九尺。俱係石砌。城樓四座。
河堤計長六百餘丈。寬九十丈。高一丈二尺。共捐銀六
萬餘兩。士民郭大申等。卽於是月具請復州治。懇印。

官回駐舊州。而新綿州士民亦以早創之堡不及帑修之。城爲堅固。懇請勿移。各赴大憲爭訟。竊思先王設城以守險。必居扼要之地。綿州在險閣之南。自過嘉陵江。卽以劍關爲全蜀鎖鑰。所謂一夫當關。萬夫莫開也。劍關至綿州三百餘里。其險與劍關等。然劍關之險。險在山。綿州之險。險在江。江爲天塹。上通龍安。隴西。下通三江。兩湖。舳舻千里。人烟萬戶。水陸交通。百貨坐集。故論關勢。生成則綿不如劍。論江形。險阻則劍不如綿。譬之居家。然舊綿門戶也。新綿堂奧也。譬之人身。然舊綿咽喉也。新綿肺腑也。防賊者有不先守門戶而使賊入室。

乎。欲食者有不先進咽喉而能使食入腹乎。必無此理矣。舊綿民執此理以爭。故新綿民終不能奪。旋經大憲批布。按二司核議。併批州確勘詳覆。而州尊亦兩無所偏據。理詳請使州仍歸綿縣。仍歸羅縣。大憲奏改以息爭端。時六年六月初五日。適原任藩憲和公寧由藏回京。道過金山驛。舊綿民復攔輿呈請轉奏。仍歸舊治。和公當即登城察驗。見丁男百上雲集城頭。俱用方石合縫堅牢。女牆亦一律完整。平岡纒繞約二百里。似天然城郭。又見衙署壇廟俱全。無庸另建。其應修處據土民寺眼同本州勘估。俱願捐資修理。不敢絲毫請動帑。

項和公面允代表。七月初七日據情入告。維時全蜀寧靜。秦楚沿邊教匪漸已搜索靡遺。大營正在奏籌善後事宜。二十一日奉 廷寄准歸入此案辦理。十一月二十一日參贊德 總督勒 等合奏。因地制宜。請將達州改府以杜後患。併請綿州州判仍移駐豐谷井。其綿州知州仍回舊州。羅江縣請將保縣裁入理番同知。仍復羅江舊縣。其餘武職文員量加添改。一併分別奏請設官。以便彈壓等因奉 硃批。軍機大臣會同該部議。具奏。經大學士慶 覆議俱如所請。二十六日奉 旨依議。又夾片改達州爲綏定府。七年二月

初十日奉到部文。自是綿州羅江俱經改定。各回舊地。新任各官俱於六月中旬擇日上任。先是署知縣陳公啓泰到羅江。新任然後。劉公到綿州。新任是日。綿民傾城出迎。歡欣歌舞。父老壺漿。兒童竹馬。彩棚錦帳。鼓吹沸天。表延數十里。士女來觀者。幾至肩摩。轂擊花園。錦簇自來。良吏之得民心。未有如此者。惜乎年至七十。不及扶杖來遊。以觀太平之盛事也。劉公自到任後。復親身相度城工。時值青黃不接。見民捐貲不敷。用復白捐廉三千金。籌款三千貫。發交管局紳士陸續支用。士民等見工費浩繁。復續捐運脚銀四千兩。以資接濟。

九月初一日。劉公據紳士意遣人以書來屬爲碑記。以識顛末。並言曰。此役也。士民捐資數逾累萬。其間有獨力捐資者。有總辦局務者。有分管工段者。急工趨事之誠。誠不可沒。職叨守土。諸凡分所當爲。斷不敢貪衆人之功。以爲己力。此意尤望鑒及。嗟乎。何其謙也。夫州縣沿革。事所常有。今舊治城於倉猝之間。締造歷三年之久。名爲復舊。實則創始。雖士民同心。用底於成。然非公爲之倡。身先士卒。恐樂輸者未必遂至於七八萬兩。而公亦前後捐輸籌撥錢米幾至七八千兩。官無請帑之煩。民無怨讟之語。急則搶修堵衛。緩則保固金湯。

古云能禦大災捍大患有功德於民者非公而誰昔晉
賈逵領豫州牧開渠通運河以利民人謂之賈侯渠今
公領綿州牧築城以衛民然則此城卽謂之爲劉
公城可也識者當不易吾言所有紳士諸名並隨公後
勒諸貞石用垂萬古

前日接展復函知修復州城碑記已蒙老先生見允
欣喜之至方謂十日一水五日一石能事不受促迫
昨弟於鄉間勘驗回署而令甥冉孝廉已賁持尊作
見示弟當卽展讀於綿州情形之扼要城堤新建之
原委殫見洽聞如燭照計數而文筆蒼勁浩瀚如幽

燕老將據鞍嬰鏢餘勇可買又如江濤澎湃沙石急
龍與流俱下足徵名下無虛敬佩敬佩

弟劉印全

南籠遺稿序

近時作西崑體者得二入焉。一爲銅梁王鎮之。汝璧。一爲鮑竹唐堯春。樂宇皆由名孝廉捷丙戌進士擢部曹。王得吏部。唐得戶部。樹幟騷壇。並駕齊驅。詩名雀起。一時人有王唐之稱。適予由庶常收銓。亦得從二君遊。每有唱酬。往反。多以資格在前。來相商酌。見兩君每自覺瞠乎其後。而時有好事者。欲以予與二君爲劍南三家之刻。比之嶺南三家。深謝弗當。予典試粵東。事遂中止。旣而予又視學其地。旋擢觀察。畿輔鎮之。亦出守順德。調保定。堯春亦出守平越。調南籠。予亦旋挂公議歸林。

章山文集補遺卷一

下者十有八年拙作遂日積日多自是天各一方不復再聚既聞王君宦途甚遠所刻有詩集人多見之余獨未見獨唐君解任鐫級偃蹇不遂又奔太夫人喪見星而行哀毀過節扶柩至夔卒於舟中予聞櫬歸曾作輓詩四首以弔之復爲作墓誌以銘其穴蓋其遺命也而亦未見其詩前年庚申避寇成都見其諸子皆已成落落有家風因訂爲忘年交去年秋闈又偕選拔諸子俱連翩同上登賢書一副榜一選拔一芝蘭玉樹森森並起書香之傳唐君可謂獨得矣獨未見其詩今年壬戌其六子子范丁生母朱太夫人艱未及會試予因延